

# Kerwered 2002

## Ohfang

Ich griese eich all met nanner, ob jung odder alt, ob schlau odder doof,  
do iwwe beim Hartmut odder beim Eßkuche im Hof!  
Vunn Nord bis Süd, vunn West bis Oschd, das war faschd schunn wirrer  
so feel,  
komm Achter mehr tringe äner! PROSCHD!

Die Zeit des Wartens, der fürchterlichen Langeweile, der absoluten  
Nüchternheit is endlich erumm,  
die Gläser wärre das Wochenend nur voll an sich genumm!  
Es schallt schunn iwwer de Bersch ins Dal enunner, es is wirrer so weit,  
in Roth is wirrer Kerwezeit!  
De Aachder unn ich mehr honn mol wirrer unsere Platz besetzt,  
vunn do aus wird mol ordentlich iwwer Eich do unne Abgehetzt!  
Ach was siehn ich dann do, do wärt de äh orrer annere Blaß!  
Machen eich nix draus, das is doch alles nor Schbass!  
Zwischedorsch isses naderlich wie jedes Johr do jowwe,  
dun mer uns dänne Wein in de Kopp nin klobbe!

Bis so e Redd geschrebb is, das is schunn e Schbass.  
Do honn ich e paar Biercher lang vorm Blatt gesass.  
Ich honn mer vezeehle geloß, was die Leit honn geschafft,  
unn mit em Lache im Gesicht, das ganze zamme gerafft.  
Do draus dun ich dann noch was Dichde,  
um eich heit vunn dänne Puscher unn Glowwe zu berischde!  
So jetzt langts, in diesem Klange,  
wärre mer jetzt mol met de Redd ohfange,  
Ich denke mol das ner Wisse wolle, was in Roth so is bassert,  
dann sein jetz mol Ruisch unn jetz werd mol zugeheert!

Ich sahn zum Aachder schnell noch PROSCHD!  
Unn schunn kanns los gehe, ab geht die Poschd!

## Selbst ist die Frau

Die meischde Männer wolles jo immer noch net Richdisch insehe,  
awwer es gebt a Fraue die was vunn Technik am Auto verstehe.  
Vorsjohr hadd ich eich jo a schunn vunn de Hella erzählt,  
die ihre Diesel met Benzin erum quält!

Das Johr hadde mer wirre so e Sach,  
do hat sich das Jung Märe vunn de Bäckerei am Auto se schaffe gemacht!  
Änes Dachs hots Melli feschedgestellt,  
das kann doch net sinn, wie im Auto mei Eelichdsche sich vehält,  
Es gehd oh, unn wirrer aus, das hots doch noch nie gemacht!  
Was honn ich dann jetzt schunn wirrer falsch gemacht?

Beim Torsten ohgeruf, ey, mei Ellischdsche geht oh unn aus, was hat dann  
das fer e Sinn?

Ei do hosche zu wänisch Eel in deem Obbel drin!  
Achso, dann dunn ich das glei mol repariere,  
bevor do dud noch was passiere!

De Deckel uff, mol ninn geguckt, do is gar nix meh drinn,  
das kann doch gar net Sinn!  
Alle gut, das grieh ich noch hie,  
wär doch gelacht, das wolle mer mol sieh!  
Es Eelkänsche uff, 5 Lidder eninn geleert,  
mehr hots dann vunn inne schunn gluggere geheert!  
E ninn geguggt, ach gott,  
wo is dann das alles hie?  
Am Rand vumm Deckel is immer noch nix se sieh!  
Alle hobb, noch e paar Lidder eninn, das hot jo alles kä Dauch,  
kann ich jo nix defor, wenn der so veel brauch!

So hot se ne dann voll geleert bis owwe ane,  
Lidder fer Lidder, Kanne fer Kanne!

Korz druff kummt dann de Torsten zu derer Sach,  
ei Melli was hosch dann Du gemacht?  
Do ist so e Stab, do sieht mer de Eelstand!  
Du kannsch das doch net vollkibbe bis unner de Rand!  
Ei siehsche doch, das geht!  
Nur das die Audo dann no kurzer Zeit steht!

Die Musik schbeelt em Melli zur ehr,  
wenn das met däm Eel doch nur halb so kompliziert wär!

## Schneemänner

Winterzeit, das honn die Leid erkannt,  
is näwer de Kerb die schänschd Zeit im Reerer Land!  
Wenn de Schnee im Hof leid bis zu de Knie,  
dann is die Welt in Roth in Ordnung, nur manche bekummt das net, das  
wäre ner awwer klei noch sieh!

Do kann mer seim Nochber mol schnell de Schnee Klaue,  
unn e Skischbrungschanz wie in Garmisch Partekirche baue!  
Manche machts a met em Bulldog fahre jede menge Schbass  
Unn so schiese se de ganze Dach mem Frontlader dorsch die gass!  
Annere hogge dehäm unn dun sich die Finger Reiwe  
„Aach was e weddersche, was kännt mer dann do jetzt noch nützliches  
treiwe?“

So a de Hartmut, der hat e Gedange, das kann ich eich sah!  
Dänner hodder dann glei seim Bu iwwerdrah!  
„Sebastian geh uff die Aachd de große Schlebber hole, do hinne beim  
Hemmer enaus steht e Weidestrauch,  
der is so groß, der geheert e bisje gestaucht!“  
„Awwer babbe, wie kumm ich dann dort hie, do leit doch 3 meder  
Schnee?“  
„Das bissje wersche doch verkrafde, das dud doch käm weh!“

Es hodem alles nix dodegäje genutzt,  
„Du fahrsch jetzt do enaus, die Dinger wäre geschdutzt!“  
Alle hob, dann hodder sei Sache zusamme gerafft, e bisje trockenes  
Brennholz, paar Öhzünder, fer de iwwerschuss klei se vebrenne!  
Um nor so e paar Sache se nenne!  
Als Hilf hodder sich de Olli uff de Bulldog gehockt,  
dänne hodder ganz äfach mem e Kaschde Bier ohgeloct!

Wann der debei is kann jo eigentlich nix schief gehe,  
 Na ja, also ich ded mer das nochemol gut iwwerlehe!  
 Mit derer Besatzung sinse dann beim Hemmer hinnenausgefahr,  
 die ware ganz schä flott unnerwegs, das kann ich eich sah.

De Schnee is immer diefer worr, das hot awwer käner intresseert,  
 De Babbe hot gesah ich soll mich net so drohstelle, unn so sinse mem  
Bulldog als weirer Maschert!
 „Ey Sebb do farre der Hang, war der net als 3 Meder hoch? Tschuldigung  
das ich froh,
 awwer irgendwie is jetzt nix meh dodefunn do!!!“  
 „Mer honn e guder Bulldog, das hot de Babbe a noch gesah“,  
 unn so sinse dann als weider denne wäsch ehinner gefahr.

De Olli als Physikgenie: „Jo, hosch recht, das sinn gefrorene Kristalle,  
 die wärre uns zwä unn die 6 Tonne Bulldog schunn owwe halle!“  
 Irgendwann is ne dann die Natur iwverkumm,  
 unn hot sich de Bulldog samt olli unn Sebbi in ihr gewalt genumm!  
 „Ach Du Scheiße jetzt hänge mer fesched, was e kage,  
 Jetzt dud noch net emol de Allrad die 3 Meder Schnee unner uns pagge!“

Sie sinn vorwärts unn rickwärts, honn noh rechts unn links gelenkt,  
 doch nix, sie hon ne als weirer im Schnee vesenkt!  
 Hui, Olli ich glaab mer honn so e klänes Probläm,  
 Wenns net taut, kummer mer in de negschd Zeit net so schnell häm!  
 Die Situation is kritisch, awwer net ausichtslos.  
 So lang noch Bier do is, mach ich mir mol net in die Hos!  
 Es Handy raus de Babbe geruf,  
 „Komm mol mem Radlader, mer honn do e Probläm,  
 ohne die Hilf kumme mer nimmi häm!“  
 Jeden honse ohgeruf, es is a jeder kumm,  
 Jeder hot sich dann glei moh e Flasch Bier genumm.  
 De Kurt is Kumm un hot mitgedenkt,  
 E Kaschde Bier uff de Schlidde unn das geschbann do her gelenkt!

Anerdhalb Kaschde speeder hat de Bulldog wirrer Grip unner de Rädder,  
ich glaab die hedde noch veir woche do geschdann wenn se gewahrt hedde  
uff besser Wedder!

Met dem Brennholz honnse dann noch Feier gemacht,  
unn dann war das doch noch e schänie Sach!

Mit Wasser kennt sich de Hartmut aus, do drin isser jo Fit!  
Doch wann das Wasser gefriert, kummd der net ganz mit.  
Mehr lernt nie aus, a in deem Alder noch!  
Schicksch net nor Deine Sohn, sondern loschder vunn ihm ah alsemol  
noch was sahe, vielleicht lernsches jo dann noch!

Die Musik schbeelt denn Schneekönische zur Ehr,  
wenn das Wasser doch net immer so heimtückisch wär!

## Computerfachmann

E Computer hot faschd jeder, das is jo a net schlecht,  
 Nor manche kumme met däm Ding äfach net serecht.  
 De Aachder do näwer mehr, fer denne war das mem Computer a kä Sach,  
 Sei Vadder hot em so e ding kaaf unn net groß Worde drum gemach!

Dehäm ohkumm, das Ding ausem Kaschde eraus,  
 Tastatur, Monitor droh, unn net vegesse ah die Maus!  
 So jetzt kanns los gehe, zeig emol was de kannsch fer e trick,  
 unn entäusch mich net, Sunsich bring ich Dich wirrer Serick!  
 Einwandfrei, der is hochgeloff, bisser nimmi kunnt!  
 Unn zum Liar seiner Fräd, war de Bildschirm a noch bunt!

So jetzt proweere was ser noch so kann,  
 doch als der so richdisch ohgefang hot, is uff ämol nix me gang.  
 Geflucht hodder,  
 mehr hoddene im Iwwerdorf noch geheert!  
 Doch das hot denne Computer am wänischde gesteert!  
 Die Experte hat der gefroht, die honn gesah, das hot kä Sinn.  
 Also Rechnung vum Babbe her, geguggt wo er das Ding hot kaaf, unn ab  
 mem PC ins Audo eninn.

Im Media Markt in Lautre, honn ich grad im Service geschdann,  
 Kummd de Aachder erinn gestürmt, unn hot dänne vezeehl, was sei PC  
 net kann.

„Sah mol honn ihr se noch all, Sinn ihr noch ganz bei Sinne?  
 Soll ich dänne Scheiß wo ihr do deier vekaafe ah noch gut finne?“  
 „Nix geht an dämm ganze Schrott,  
 Gäwen mehr e neier, awwer Flott!“  
 Ich honn mehr das mol ohgeheert, das war wärklich intressant!  
 Also ehrlich gesah, ich fands schunn zu däm Zeitpunkt ziemlich amüsant!

Awwer de hammer kummt noch, hallen eich fesched,  
 wann ich was getrunk honn, vezeehl ich eich noch de Rechd!

No zeh Minudde, isser dann moh widder Ruhischer worr, wie sich das  
geheert fer e Reerer,  
unn sogar de Vekäufer hot dann gasah das ganze Probläm vestehrer!  
Mehr dausche das Gerät aus, das krieg mer hie,  
Kännt ich mol bidde die Rechnung Vunn dem Gerät sieh?

Sicher sahd de Aachder unn hot sem halt  
Direkt vorm uff de Disch geknallt.  
De Verkäufer guggt druff unn hot geschmunzelt,  
unn e klää bisje die Stirn gerunzelt.  
„Was isser?“ hot de Liar gefroht.  
„Gibt’s Probläme?  
Odder muß ich mich fer dänne Kaufpreis schäme?“  
„Nä, sie wisse mehr sinn do im Media Markt“ „Ei jo, halle se mich jetzt  
noch fer bleed??“  
„Nä bestimmt net, awwer gugge se mol was do druff steht!“

Mehr kunnts beobachte, wie de Liar uff ämol ganz Ruhisch worr is.  
Ach Du scheiße, jetzt honn ich mirs do ah noch verschiss.  
3 Zentemeter hoch, 10 brät, es hot jeder Richdisch geläs,  
MEDI MAX hot das uff derer Rechnung gehäß!

Och nä, do hedd ich känne alles druff vewedde,  
jetzt muß ich mich irschendwie aus derer Situation Redde!  
„Ach, äh jo, das honn ich gar net gesieh,  
sahnse mol, wie kumm ich dann dort hie?“  
Er hot seine Computer unner de Arme genumm  
Unn is ganz schnell ausem Media Markt verschwunn!

Ich hoffe Du hosch jetzt gelernt, das mer die Vekäufer net kann lingke!  
Im annere Däl iss mehrs a egal, komm mehr dun liewer noch äner tringe!

Die Musik schbeelt däm ABC Schütze zur ehr,  
wenn doch Mark unn Max nor net so ähnlich wär.



## Pro. Dr. Wassermann

Do driwwe, genau do gäeniwwer, Do wohnt e Mann,  
 der alles was met Wasser se due hot arisch gut kann.  
 Vorsjohr honn ich jo schunn iwwer ne gehetzt,  
 wo er hot sei Wohnung unner Wasser gesetzt.

Dasjohr wars, es is schunn e bisje her,  
 wollter e Kawel in de Keller lehe, das is jo a net so schwer.  
 Awwer, so was muß berechelt sinn, das is jo klar,  
 weil in so ner Deck vebirgt sich jo die äh odder anner Gefahr!

Wasserleidunge, Fußbodeheizung unn so fort,  
 do muß mer sich schunn suche de Richdiche Ort.  
 Das hot ah de Hartmut erkannt, der is jo schunn net bleed,  
 die Plän vumm Haus eraus unn mol gugge was do drin steht.

Dahelang warer weg, mer hot ne schunn negschd als vemisst gemellt,  
 awwer er hot nur Formele fer sei Bohrung erstellt!  
 Mojens kummt der dann met zwä Meder in em Winkelmesser beim Seppi  
in die Schdubb gefall,  
 „Babbe was machschen Du do? Hosch Du se noch all?“  
 Ich bin Ferdisch, ich hons eraus,  
 ich wäs jetzt wie mer kummt am beschde met dem Bohrer do owwe zu de  
Deck enaus!

Ich vesuch eich die Theorie mol zu erkläre, ich honnse net kabbert,  
 das dud das ganze noch erschwere!

Also, met äm Meder enuffer,  
 mem anner eriwwer,  
 dann wäre mer schun fasch iwwerem Zielpunkt driwwer.  
 So, dann guck ich, das ich dodefunn die Wurzel zieh,  
 das ganze nämm ich dann noch mol Pie!  
 Dänne Winkel um dene Wert kärzer gemach,  
 dann honn ich mei Punkt wo ich Bohre muß, das is jo käh Sach!

So hot der dann met ach unn Krach,  
mit Winkelmesser näwer de Bohrmaschien das Loch do in die Deck  
gemach!  
De Sebbi steht hinne droh unn denkt, met dänne neie Maschiene, das gäbt  
jo e ganz schänie Sauerei,  
do is jo noch e Wasserkühlung am Bohrer met debei!

Dann kummt nur noch e laudes „SCHEIßE“!  
Do kännt ich mehr doch was abreiße!  
Alle Rechnunge hadde iwwerhaubt kä sinn,  
jetzt schdeh ich doch mem Bohrer in de Leitung vunn de  
Fußborremheizung drin!  
Die Enttäuschung war groß, das hot merm ohgesie,  
jo, wann ich das so Richdisch berechele, kriesche a dänne Wasserschade  
Wirrer gut hie!

Awwer siehs net so eng, das hot jo ah seine Sinn,  
mehr Suche immer Theme fer in die Kerweredd eninn!  
Das dud sicher kärer vunn uns steere,  
im gähedäl, mehr frühe uns schunn wirre uff negschdjohr, wann de uns  
dusch wirrer änie vunn deine Rechnunge erkläre!

Die Musik schbeelt däm Prof. Dr. Wassermann zu Ehr,  
wenn doch die verflixt Wasserleitung net wär.

## Autoknacker

Rock am Ring, so hästs jedes Johr So um die Pingschde Zeit,  
 unn wo gefeiert, sinn die Reerer meischdens net weit.  
 Also honn sich e paar zusammegeschloss  
 Unn sinn schunn Dannerschdachs Richtig Nürburschring geschoss!

Do owwe geht's ab honn ich vezeehrt gried,  
 weil mer sich do de ganze Dach nur es Bier in de Kopp zieht!  
 Doch Ordnung muß sinn, saht de Peter,  
 Deswäje basst de Essi uff de Christoph uff  
 Unn de Christoph uff de Essi.  
 Ich basse uff de Olli uff  
 Unn de Olli ....  
 Na ja, dodezu kummer ich speeder!

Das hot gehall bis Freidachs, dann hot de Olli sei Tour.  
 Ich geh jetzt mol allä unn ziehe mei eigenie Spur!  
 Paß uff Dich uff, Du wäschs genau,  
 wann was bassert machts Babsi net nor Dich sondern uns a noch zur Sau!  
 Dann isser ab unn mol langsam iwwer de Campingplatz gewankt,  
 unn hot sich fer jedes Bier recht herzlich bedankt!

Irgendwann Nachts kommt er zurick zu seim Ausgangsort,  
 doch dort warer allä, die annere ware all fort!  
 Kä Probläm saht de Olli, dann dun ich mich halt in mei Audo lehe,  
 nur wo honn ich dann das jetzt stehe?  
 Wer suchet der findet, selbst ist der Mann,  
 unn so hot er dann irgendwann vor seim Audo geschdann!

So, jetzt nur noch de Schlüssel,... ach Du Scheiße, entweder er is geklaut  
 odder ich honne velor.

Na alle, 10% Veluscht kummt iwwerall vor!  
 Ich will schloofe, ich bin so mied!  
 Mol gugge, wie mer das sunschd noch uff gried?!

Uff ämol hodder die Idee,  
ich bin doch gähe Glasschäde vesichert, das dud mer bestimmt net weh!  
Genau das isses, unn so isser ganz unvedross  
mem rechde Fuß ins linke Seidefenschder geschoß!  
Die deer uff, eninn unn geschloof,  
das wär doch gelacht, mer is jo net doof!

Lang hats net gedauert, bis er venemmt so e Krach.  
„Ey, hosch du se noch all? Was haschen met meim Audo gemacht?“  
Die mache ein Ballawer do aus, hoffentlich geht das net die ganz Naacht  
Wenn ich doch jetzt die Scheib hochmache kännt, hett ich mer das ganze  
erspart!

Uff ämol tippt em äner an die Schulter. Hallo?  
De Olli dreht sich rum, ach genowend, was machen die Herre  
Bollizeibollizischde do?  
„Das frohe mer sie, schdeije se mol aus  
unn hole se mol ganz schnell ihre Ausweis eraus!“

In dem Moment kummt de Peter zu derer Sach.  
Ach Olli, was hosche dann jetzt schunn wirrer kabutt gemacht?  
De Olli dreht sich erum uff ämol klingelts: „Ach Du scheiße, das kann  
doch garnet sinn,  
wieso sitz ich dann in dem Audo drin?“

Das känne se uns klei mol erkläre,  
wenn mehr ihre Ausweis honn, das mer sie mol verheere!  
Denne kann ich eich net gäwwe, der is beim Kollesch im verschlossene  
Audo drin,  
awwer wennse kä Zeit hon, trät ich schnell die Scheib eninn!

Ich glaab es geht los, sie sinn wohl nimmi ganz bei Sinne!  
Gugge se besser mol das se ihre Kollesch finne!  
Oh Mann, jetzt honn ich beim Saufe mei Audo net debei,  
dauerts net lang un es kummt trotzdem die Polizei!

Glei druff is dann de Essi kumm,  
denne hot de Olli glei in die Mangel genumm!  
Essi, Essi, ich brauch meine Ausweis!  
Mach emol langsam, was bausche dann a immer so e scheiß?  
„Die zwä Bollizischde solle mol net unlocker wärre,  
Ruf se mol her, dann dun mer mol zamme änner zerre!“

Die wollde net, unn sinn a net kumm,  
dodefor honnse de Olli mol zwä Schdunn vernumm!  
So e Vewechslung kann jo mol bassere,  
das nämmt der jo känner krumm!  
Die Audos siehn jo a faschd all gleich aus, vier Räder, Fenschder, unn e  
bissje Blech drumm erum!  
Nur das die Golf dehäm war, hesche müsse bedenge,  
unn net äfach die Fuß in annerleits ihr Fiat lenge!

Die Musik speelt em Olli zur ehr,  
wenn die Sauferei net immer so deier wär!

Endlich Dicht, Zeit für mich!

## Schluß

So, es langt fer heit, ich dun mich bei eich bedange  
unn langsam vunn derer Läder wange!  
Die Redd fer dasjohr is wirrer gehall  
Unn ich hoff es hot eich wänischens e bissje gefall!

Jetzt geht's erschd los, jetzt kummer mer zum schääne,  
dodebei muß ich grad mol unser Stänsche erwähne!  
Do gäbts Getränke, bis nix meh eninn geht,  
honn ich eich schunn gesah, daß das heit owend unn moiye a noch steht?  
Die Kerweredd gäbts do unne a se kaafe, das is de Hit,  
desweje nämnen a ännie fer die Oma, Oba unn die Vewandschaft mit!

Awwer warden mol, bevor ner all die Kerweredd kaafe,  
mehr müsse dänne schöne Strauß jo a noch daafe!

„Ach wie schää“ so soll mer Dich nenne bis negschd Johr um die Zeit,  
hoffentlich siehsche dann wänischens noch annähernd so gut aus wie heit!  
Odder Edgar, was sahsch Du zu derer ganze Sach,  
das hommer doch mol wirrer gut gemacht!?

Siche, genau das wolde mer heere,  
denne Seege hommer, do brauch sich dann speerer känner meh se  
beschwere!

Dank an de Eischän, das lief wirrer alles glatt,  
weil mer wirrer knibbelle durfte bei ihm in de Werkstatt!

Also a dasjohr gilt, wirrer e bissje dumm drohstelle, das mehr all honn was  
se lache,  
Hauen rinn unn machen wirrer e paar dumme Sache!

Wenn ner mähne das het kä sinn,  
Stimmt net, ihr kumme dodedorsch sogar ins Internet eninn!

Unner [www.reererkerb2000.de](http://www.reererkerb2000.de) dun mer eier Tate beachte,  
unn do känne ner eich a e paar Bilder betrachde!  
Sieh ner, alles wird belohnt, a in unserm Kreise,  
also auf geht's, bauen wänischens e bissje Scheiße!

So, genuch gebabbelt, ich bedank mich fer eier Uffmerksamkeit,  
wann ich uff die Uhr gugge, werts langsam Zeit!  
Alla dann, ich wünsch eich was,  
dun eich noch ordentlich vekniesche uff deerer Gass!

Zum Abschluß kummts wie jedes Johr,  
de Aachder kreischt nochemol vor!